

UTLAND

Leder: **TROND OLAV SKRUNES** tlf 55 21 45 23
e-post: utland@bt.no

VAL I NEDERLAND // Geert Wilders vil forby koranen og stengje alle moskear. Sjølv for sine eigne veljarar kan mannen med politikken bleikaste hår bli for ekstrem.

På Wilders' heimebane

MIDTPUNKET: Geert Wilders starta Partiet for fridom (PVV) i 2006. Han er framleis einaste medlem. I tillegg til at årsmøta dermed går raskt unna, betyr det og at Wilders har tilnærma all makt i partiet.

I NEDERLAND



ØVIND LEFDAL EIDSVIK
oyvind.lefdaleidsvik@bt.no
Journalist i BT

Byens store son har gitt europeisk populisme både ansikt og frisyre.

Onsdag er det val i Nederland, og ostehandlar Frans van Lin i Venlo har bestemt seg.

Det blir bysbarnet Geert Wilders.

– Vi er jo stolte av han, seier van Lin framfor hyllene med velluktande ost.

Den beste provinsen

Venlo og resten av provinsen Limburg, heilt sør i landet, er Wilders og hans einmannsparti

PVV's beste kort. Her har dei gjort det best både ved sist parlamentsval, sist provinsval og sist EU-val.

PVV, Partiet for fridom, er venta å bli størst eller nest størst i det nederlandske parlamentet. Å bli størst ville tradisjonelt bety deltaking i regjeringskoalisjonen. Dei andre partia har til no avvist samarbeid med PVV etter valet.

Wilders er blitt meir kontroversiell med åra. Etter kvart som andre parti har kome etter i hans retning, har Wilders gått lenger. Det ei side lange programmet er spekket av kontroversar i eit land med ry for toleranse: Forby koranen, lukke moskear, stengje grensene for alle frå muslimske land, trekke tilbake alle opphaldsløyve for asyl, og, ikkje minst, melde Nederland ut av EU.

– Altså, dei færreste er vel 100 prosent einige med Wilders. Eg er kanskje 50, seier van Lin.

Men ostehandlaren i Venlo seier han har gode grunnar for å stemme på Wilders: Han gir folket det dei vil ha. Der andre politikarar er som ein «bøling afrikanske bøflar», er Wilders unik.

– Han jobbar hardt for sine synspunkt. Kanskje er berre ti prosent av det han seier realistisk. Men det er betre enn kva dei andre klarer.

Nedover på målingane

Nøyaktig kor store PVV blir, er usikkert. Etter å ha vore suverent størst på meningsmålingane, har partiet tapt terreng dei siste månadane. Dei siste to vekene har dei vore mindre enn hovudkonkurrenten, borgarlege VVD.

Nico Baakman, førsteamanuensis ved Universitetet i Maastricht, også i Limburg, åtarar mot å tru at Wilders ikkje kan kome først.

Ein ting er den naturlege skepsisen til meningsmålingar



Kanskje er berre ti prosent av det han seier realistisk. Men det er betre enn kva dei andre klarer.

Frans van Lin, ostehandlar

etter Brexit og Trump, meiner han.

– Mange Wilders-veljarar har ikkje brukt å stemme. For nokre dagar sidan viste ei måling at 70 prosent av veljarane ikkje hadde bestemt seg. Gudane må vite kor dei ender opp, seier Baakman.

850.000 førstegongsveljarar kan delta i år, og PVV gjer det godt blant Nederlands unge. Biletet er det same i Frankrike, der Marine Le Pen og Front National gjer det best blant dei yngste.

I tillegg har ein spørsmålet om demonstrasjonar og maktbruk i Rotterdam laurdag, etter Nederlands utvisning av ein tyrkisk minister, vil slå ut i valet. Både Wilders' PVV og statsminister Mark Ruttes VVD kan vinne på hendinga.

Vest-aust-konflikten

I Norge snakkar vi om aust-vestkonflikt. I Nederland er det vest-aust.